

Submission Date: 29/04/2021 Accepted Date: 14/09/2021 Publication Date: 15/12/2021

BOOK REVIEW (ULASAN BUKU)

Ahmad al-Raisuni. (2019). *Maqasid Keamanan: Agenda Keamanan Menurut Islam*. Penerjemah: Marwan Bukhari A. Hamid. Kuala Lumpur: Maqasid Institute, Maqasid Resources. 52 halaman, ISBN 9789671558959.

Reviewer (Pengulas): Hasri bin Harun. Pengarah, Institut Maqasid Syariah (INSMAQ). Pusat Kecemerlangan (COE) Universiti Selangor (UNISEL).

Apa yang muncul daripada pemikiran saya apabila membaca buku *Maqasid Keamanan: Agenda keamanan Menurut Islam* ini adalah suatu konsep yang sangat jelas tentang keamanan yang berpaksikan kepada tujuan hukum syarak yang menjadi asas kepada pemahaman berteraskan kesejahteraan masyarakat berdasarkan prinsip Islam. Buku ini telah mendedahkan tentang elemen keamanan yang bersifat holistik yang menjadi teras kepada pemahaman konsep jihad yang selalu disalahtafsirkan oleh segelintir masyarakat. Keamanan berteraskan prinsip *Maqasid Syariah* adalah suatu terjemahan kepada konsep Islam iaitu memelihara kedamaian dan kesejahteraan manusia diatas muka bumi ini. Karya tulisan Prof Dr Ahmad al-Raisuni ini telah membuka minda pembaca untuk memahami konsep *al-Salam* yang berteraskan kepada tujuan syarak. Ini memberi gambaran yang cukup jelas tentang prinsip Islam sebagai agama yang memartabatkan kedamaian dan keamanan sejagat.

Buku *Maqasid Keamanan, Agenda Keamanan Menurut Islam* adalah satu tulisan daripada seorang tokoh ulama *Maqasid* iaitu Sheikh Prof Dr Ahmad al-Raisuni, Ketua Kesatuan Ulama Islam Sedunia (KUIS) yang diterjemahkan oleh Marwan Bukhari A Hamid dan diterbitkan oleh Maqasid Institute. Buku ini berasal dari karya Arab karangan Sheikh Prof Dr Ahmad al-Raisuni yang bertajuk *Maqsid al-Salam Fi Sharia al-Islam*. Ia mengandungi 3 bab di dalamnya. Buku ini dihasilkan bertujuan untuk memperkayakan lagi kupasan dan ilmu berkaitan syariah dan *maqasid syariah* yang mana mengupas salahsatu daripada keutamaan dalam kehidupan insan iaitu hak keamanan yang diberikan oleh Islam. *Fiqh al-Salam* iaitu Fiqh keamanan yang dikupas oleh Prof Dr Ahmad Raisuni ini berkisar daripada persoalan sejarah, hujah pensyariatan terhadap kepentingan membawa kebaikan dan mengupas tentang apakah *Maqsid* keamanan dan dalil-dalilnya menurut perspektif islam. Buku ini cukup penting dibaca bagi memahami aspek-aspek berkaitan dengan kedudukan syariat Islam dalam mengangkat tema keamanan dan memahami apakah konsep dan elemen jihad dan kaitan dengan pengangkatan kesejahteraan dan keamanan dalam kehidupan.

Pentingnya elemen keamanan sebagai salahsatu daripada objektif kehidupan insan di dunia dan ianya selaras dengan nilai dan jatidiri islam sebagai agama yang memelihara keamanan sejagat. Huraian awal oleh penulis tentang hujah pensyariatan jihad yang berpaksikan kepada elemen *al-Salam* ini memberi satu tanda dan kefahaman bahawa Islam adalah agama kedamaian dan tidak menimbulkan sebarang ketegangan. *Fiqh al-Salam* ini telah diangkat sebagai teras kepada kekuatan Islam yang ditunjukkan oleh Junjungan Nabi SAW.

Bab satu dalam buku ini penulis mengupas tentang sejarah dan latar perjuangan Rasulullah SAW ketika difasa awal Islam mula berkembang di Makkah. Betapa perjuangan awal Islam pada ketika amat mencabar dimana umat Islam hanya berhadapan dengan tekanan dan penentangan yang berterusan daripada pihak Quraisy Makkah. Umat Islam tidak sekali-kali berniat untuk memerangi musuh namun ianya bertahan dengan tekanan yang diberikan. Oleh yang demikian sejarah telah membuktikan ramai dikalangan umat Islam yang berhadapan dengan ujian tekanan yang sangat tragis dan tidak kurang juga yang terkorban. Implikasi yang sangat besar hasil daripada Hijrah Rasulullah SAW dan pengepungan yang dilakukan oleh musuh dan bagaimana pelbagai usaha dilakukan bagi menyekat usaha dakwah islamiah yang di bawa oleh Rasulullah SAW pada ketika itu. Dan akhirnya penulis menjelaskan bahawa perintah Allah diberikan kepada umat islam agar berhijrah ke Madinah bagi membina kekuatan dan menjaga kemurnian dakwah Islam. Namun usaha-usaha penentangan masih tetap berterusan sehingga membawa kepada percubaan membunuh baginda SAW. Seinggalah Allah Taala memerintahkan agar umat Islam menggunakan hak mereka untuk berperang bagi mempertahankan diri.

Dalam konteks sejarah perjuangan Islam, sememangnya Islam tidak pernah memulakan sesuatu penentangan namun hakikatnya adalah demi mempertahankan diri. Sejarah telah membuktikan betapa umat Islam pada ketika itu berada dalam jumlah yang sedikit dan berhadapan dengan tekanan demi tekanan namun Islam tidak berada dalam keadaan menekan. Namun dalam tekanan dan peperangan secara psikologi ini walaupun agak menekan tetapi tidak sekali menjauhkan diri umat islam daripada kebenaran. Seinggalah keadaan ini dimana turunnya pensyariatan penghijrahan daripada Allah Taala. Betapa umat Islam diberi motivasi yang cukup besar digambarkan oleh Allah dalam Surah al-Anfal ayat 30. Begitulah sehinggakan perintah penghijrahan ini pun umat islam masih berada dalam suasana berperang dengan kaum musyrikin. Usaha mengepung Rasulullah SAW dari keluar daripada Makkah dilakukan namun dengan izin Allah penghijrahan itu berjaya dilaksanakan dengan baik.

Manakala dalam bab dua, penulis menghuraikan aspek-aspek berkaitan dengan hujah pensyariatan. Dalam bab ini dikupas tentang aspek perintah dan keizinan Allah SWT kepada umat Islam untuk turun berperang bagi mempertahankan Islam. Namun dalam aspek peperangan ini ternyata Syariat Islam menggariskan beberapa batasan

dan perkara yang mesti dipelihara daripada peperangan tersebut. Beginilah betapa Islam amat memelihara disiplin dan peraturan dalam peperangan. Terdapat enam alasan dan batasan yang harus dijaga oleh umat Islam dalam peperangan. Keenam batasan ini menunjukkan garis panduan yang dijelaskan dalam Al-Quran al-Karim. Justeru melalui dalil-dalil yang digariskan menunjukkan betapa hujah pensyariatan peperangan ini harus difahami secara benar menurut falsafah ilmu. Dengan kata lain walaupun dalil berperang itu ditegaskan dalam al-Quran namun dia harus difahami dengan alasan dan batasan tertentu. Bukan sekadar memahami makna literal ayat perang tersebut dalam al-Quran. Dalam bab ini juga penulis mengupas pandangan 2 ulama terkemuka iaitu Ibn Taimiyyah dan Ibn Qayyim.

Penulis secara umumnya menggariskan pandangan ulama ini berkaitan ayat peperangan surah al-Baqarah 256. Menurut penulis betapa Ibn Taimiyyah melalui yang bertajuk *“Kaedah Ringkas Perihal memerangi orang kafir dan perdamaian dengan mereka serta pengharaman membunuh mereka kerana semata-mata kerana kekufuran”* menunjukkan bahawa jika peperangan dilakukan demi memerangi golongan kuffar maka mereka yang tidak terlibat tidak wajar diperangi. Begitu juga penulis membentangkan pandangan Ibn Qayyim tentang hal peperangan ini. Ini menunjukkan bahawa Islam tidak memulakan peperangan sehinggalah mereka dikalangan golongan kuffar yang memulakannya. Pendapat Ibn Qayyim jelas diterangkan bagaimana peristiwa perdamaian dengan Quraish selama sepuluh tahun, Islam tidak memulakan peperangan dan pengkhianatan. Disinilah menunjukkan Islam mengajar umatnya bersikap aman dan tidak melakukan tekanan dan peperangan pada keadaan yang tidak perlu. Ini sekali lagi dijelaskan oleh Allah dalam al-Quran dalam surah Taubah ayat 7.

Secara jelas ini menunjukan bahawa tohmahan bahawa Islam adalah agama keganasan sesuatu yang dangkal. Salahfaham tentang peristiwa keganasan yang berlaku sedikit sebanyak memberi gambaran buruk berjaya dijelaskan dalam buku ini sebagaimana terdapat dalam dalil dan bukti-bukti yang sahih. Dalam konteks Maqasid bagaimana Islam amat memelihara kehidupan dan nyawa manusia. Tiada suatu keadaan yang mengizinkan berlaku sesuatu tindakan membunuh melainkan jika telah berada dalam keadaan terpaksa atau memelihara diri dari kebinasaan.

Manakala dalam bab ketiga yang juga merupakan bab terakhir buku ini menghuraikan tentang dalil-dalil Maqasid Keamanan menurut Islam. Disinilah huraian penting daripada tajuk buku ini. Dalam bab ini diuraikan asas penting Maqasid keamanan berdasarkan panduan syarak. Tidak ramai dikalangan ilmuwan membicarakan aspek keamanan sebagai teras utama dalam konteks kehidupan. Dalam konteks peperangan Islam tidak sama sekali mengangkat pedang melainkan demi mempertahankan diri. Huraian tentang prinsip Maqasid keamanan (salam) dibincangkan dalam buku ini. Islam sebagai agama sendiri sudah membawa makna keamanan (salam). Huraian ayat dalam surah al-Baqarah 208 tentang seruan Quran

untuk masuk dalam Islam ertinya ke dalam keamanan. Suatu gagasan besar kepada golongan bukan islam kepada agama yang penuh dengan keamanan. Dalam menghuraikan ayat al-Baqarah 208 yang membawa erti masuk kedalam islam itu bererti masuk dalam Islam dengan kedamaian. Makna *salam* dalam ayat surah al-Anfal juga membawa konotasi kepada peperangan. Ertinya masuk ke dalam Islam sebuah agama keamanan. Begitulah jelas betapa besar dan indah Islam sebagai agama yang mengangkat tema keamanan. Walaupun diberi ruang peperangan namun jelas agama Islam bukan agama keganasan dan menggalak peperangan. Huraian demi huraian berdasarkan dalil Quran oleh penulis amat memberi pencerahan dalam memahami pensyiaran dengan jelas berdasarkan prinsip syarak. Disinilah kekuatan buku dan huraian oleh penulis membicarakan persoalan dasar akan hukum Islam yang menjelaskan tentang konsep keamanan dalam kehidupan.

Manakala diakhir buku ini penulis menghuraikan pandangan *Allal Fasi* tokoh pengasas ilmu maqasid tentang agenda keamanan sejagat. Pandangan *Allal Fasi* ini cukup menarik dibahaskan tentang perspektif peperangan yang sering disalahtafsir. Persoalan apakah Islam mengharuskan peperangan? Dan betapa Islam menekankan keamanan dan kesejahteraan masyarakat daripada peperangan. *Allal Fasi* adalah ulama yang paling tegas membicarakan tentang perihal keamanan sebagai salahsatu objektif syarak. *Allal Fasi* dalam bukunya *Maqasid Syariah al-Islamiyah wa makarimuha* menjelaskan tentang tujuan Islam dihadirkan adalah mengharamkan peperangan dan mengangkat keamanan. Terdapat beberapa hujjah yang digariskan oleh *Allal Fasi* tentang agenda keamanan sejagat ini. Antaranya keharusan peperangan kerana terdesak demi mendapatkan keamanan, mengelak penindasan dan menghalang kezaliman berleluasa. Amat menarik sekali penulis mengupas tentang beberapa syarat yang menjatuhkan perintah berperang apabila tiada lagi tujuan peperangan sebagaimana kehendak syarak, kedua apabila adanya unsur perdamaian yang diminta dan wajar dilaksanakan dan ketiga apabila ada seruan yang diangkat diperingkat sejagat. Ini menunjukkan bahawa peperangan yang berlaku dalam sejarah Islam adalah bersebab dan bukan berlaku di atas dasar ada kekuatan dan mengikut hawa nafsu semata-mata. Sebagai contoh Perang Badar yang berlaku pada 17 Ramadan, tahun kedua Hijrah adalah disebabkan untuk mempertahankan diri daripada kaum Quraish Mekah yang berdendam dan cuba membunuh nabi Muhammad SAW serta mengancam kaum Muslimin di Madinah.

Secara kesimpulannya buku ini amat penting dan amat besar ertinya kepada pembaca sekalian bagi memahami apakah tujuan keamanan yang digariskan dalam Islam. Penulis begitu mendalam memahami aspek *Fiqh al-Salam* dan berjaya menghurai aspek-aspek berkaitan Maqasid atau objektif keamanan menurut kaca mata Islam. Panduan yang diberikan dalam buku cukup besar dan mampu memberi kita satu gambaran bahawa unsur keamanan ini juga boleh termasuk dalam baris objektif utama dalam kerangka Maqasid yang ditetapkan. Sememangnya hakikat Islam

sebagai *ad Din* memberi satu panduan memahami jihad dan realiti peperangan berdasarkan tujuan sebenar. Terdapat kalangan masyarakat yang tidak memahami erti jihad dan peperangan menurut Islam. Erti jihad hanya difahami dalam erti pembunuhan dan peperangan walhal islam tidak pernah mengajar umatnya sedemikian. Justeru amat wajar difahami erti *Maqsid al-Salam* ini dalam memahami kemurnian islam dalam mengangkat keamanan berdasarkan panduan syarak.

Buku ini adalah suatu yang sangat baik dibaca dan dijadikan rujukan kerana penulis telah memberi gambaran yang cukup baik dalam memahami konsep *al-Salam* dari kaca mata hukum syarak. Berdasarkan konsep *al-Daruriyyat* dalam huraian Maqasid Syariah, konsep *al-Salam* ini juga menjadi sangat penting dalam memenuhi keperluan kehidupan manusia diatas muka bumi ini. Huraian penulis tentang konsep *al-Salam* atau keamanan berdasarkan prinsip Maqasid sangat tepat dan perlu difahami dan dipraktikan sebagai satu usaha membetulkan konsep keamanan menurut Islam. Berdasarkan kepada kontek perbincangan yang dihuraikan oleh penulis, buku ini sangat komprehensif dengan contoh-contoh yang bermula pada zaman Rasulullah SAW dan kupasan dikalangan ulama kontemporari. Sebagai tokoh Maqasid kontemporari Prof Sheikh Dr Ahmad al-Raisuni telah memberi satu makna dan gambaran yang cukup jelas tentang pendirian Islam sebagai *ad-Din* yang mengangkat tema keamanan dan kesejahteraan masyarakat.